

Aruba mester a acepta investigacion CFT



ORANJESTAD -- Minister Juan David Yrausquin di Financia y Organizacion Gubernamental a entrega su retiro ayera na Gobernador di Aruba. Su motibo, 'abuso increibel di poder' di parti di gobierno Hulandes sosteni pa e propio gobernador.' Na Bon Dia Aruba, Yrausquin ta papia di 'un gran inhusticia' y prome mandatario no tabatin otro opcion di bay di acuerdo cu un investigacion riba presupuesto.

Lesa e detayenan riba pagina A2

Juan David Yrausquin a entrega su retiro como minister

Prome minister no tabatin otro opcion cu bay di acuerdo cu investigacion CFT

ORANJESTAD — Minister Juan David Yrausquin di Financia y Organizacion Gubernamental a entrega su retiro ayera na gobernador Fredis Refunjol. Motibo pa esaki ta loke e mandatario ta yama 'abuso increibel di poder' di parti di gobierno Hulandes, cual segun e a wordo sosteni pa e propio gobernador. Den un entrevista exclusivo cu Bon Dia Aruba for di Hulanda, Yrausquin ta bisa cu Aruba a wordo haci 'un gran inhusticia' y cu prome minister Mike Eman no tabatin otro opcion cu bay di acuerdo cu un investigacion riba presupuesto.

Na Bon Dia Aruba Yrausquin ta declara cu el a tuma e decision antayera noch y a manda e carta ayera mainta, despues di a skirbi diferente version.

E ta bisa cu a pesar di su decision e ta sostene prome minister Mike Eman y partido AVP '100 por ciento'.

"Aruba a wordo haci un gran inhusticia." Prome minister Eman a declara antayera pa loke ta e acuerdo pa laga un team di profesionalnan investiga presupuesto 2014, cu negociacionnan cu minister di Relacionnan di Reino Ronald Plasterk y prome minister Hulandes Mark Rutte a bay den un ambiente constructivo y profesional como partnernan igual den Reino.

Yrausquin di su banda ta pinta un situacion completamente diferente y ta muestra cu e no ta di acuerdo cu loke Aruba y Hulanda a acorda.

"E acuerdo ta e resultado di presion cu mi ta referi na dje den mi carta pa gobernador. Prome minister no tabatin otro opcion cu bay di acuerdo. Si no Aruba lo a bay bancarota."

E carta

Den e carta na gobernador, Yrausquin ta denuncia 'e abuso increibel di poder cu a wordo eherci riba e gobierno di Aruba den e ultimo simannan pa e Gobierno Hulandes y cual abuso di poder lamentablemente a wordo sosteni pa gobernador.' "Abuso di poder aki a causa y ainda

ta causando daño serio na e credibilidad y financia publico di nos pais pa cual mi no por sigui carga responsabilidad." Yrausquin ta muestra den su carta cu e ta esun cu ta carga e responsabilidad ministerial pa e actonan di gobernador pa loke ta financia publico.

P'esey el a saca su propio conclusion y ta asumi responsabilidad politico pa loke e ta cualifica como abuso di poder cometi pa gobernador.

Segun e mandatario, den e ultimo simannan gobierno Hulandes, bou capa di Gobernador a eherce autoridad riba Aruba 'sin tin e responsabilidad legal, constitucional, ni financiero na momento cu tin consecuencias pa nos Pais.'

"E Pueblo Arubano, e Parlamento cu e Pueblo a eligi y e Gobierno cu e Parlamento aki ta sostene a wordo chantahia y humilia den un forma nunca antes bisto, mientras institutonan Arubano a sostene e actonan repudiabel aki." Yrausquin ta yama institutonan aki 'cobarde' den contexto ey.

Yrausquin den su carta a muestra tambe riba su opinion cu pa gobierno Hulandes 'palabracion ta palabracion' te ora e palabracion ta toca algo cu gobierno Hulandes tambe tin cu cumpli cun'e.

"Manera por ehempel introduccion di un instancia independiente pa evalua diferencia di opinion riba Statuut, cual palabracion a wordo haci den Consejo di Minister di Reino y den parlamento di Reino como condicion di Aruba pa coopera na cambio di Statuut.

Ningun momento mi a wak gobernador sali na defensa di e palabracion cardinal aki pa asina por papia di un estado di derecho den Reino Hulandes.

Den e ultimo simannan y lunanan mi a siña compromete pa ki motibo gobierno Hulandes ta nenga categoricamente di coopera pa duna contenido na palabracion importante aki," segun Yrausquin.

E mandatario a termina su carta bisando cu tabata un honor di por sirbi su pais, cu pueblo di Aruba semper mesenter keda e maximo autoridad di e pais aki y cu un apelacion na gobernador pa firma presupuesto 2014 pa asina 'evita daño irreversible na nos Pais y nos financia publico'.

Declaracion di prome minister

En bes di duna un conferencia di prensa, prome minister Eman a opta pa duna declaracion na un periodista y saca un comunicado.

E prome mandatario ta declara cu el a combersa cu minister Yrausquin y tin respeset pa su decision. A pesar di esaki, el a pidi'e pa reconsidera su decision. Riba pregunta kico e lo bay haci awo cu el a entrega su cartera y si e ta dispuesto pa reconsidera su decision, Yrausquin a bisa cu e kier tempo pa dicidi su proximo paso. "Ayera marduga mi a tuma decision aki. Duna mi poco tempo pa laga tur esaki sink in."

Gobernador

For di gabinete di gobernador tambe a sali un comunicado. Manera ta conoci, gobernador Refunjol no a firma presupuesto y a tene esaki pendiente pa asina duna espacio na Aruba y Hulanda pa yega na un palabracion pa loke ta acuerdonan haci. Esaki a resulta den e acuerdo pa un investigacion riba e presupuesto. Den e mesun liña aki, gobernador lo no pasa pa firma e presupuesto awo.

"Tampoco gobernador lo dicidi pa no stipula e presupuesto, pa cua e ta cualifica como organo di Reino, y basa riba articulo 21 di Reglement van de Gouverneur van Aruba.

Ta te ora cu e ricibi e rapport preliminar cu ta redacta, basa riba e palabracionnan mencionan anteriormente, anto e lo reconsidera e decision expresa aki riba, den caso cu e rapport aki ta duna motibo pa esey.

"Articulo 21 ta bisa cu gobernador no ta firma un Landsverordening ora cu e ta considera cu e decreto ta en pugna cu Statuut, cu un reglamento internacional, cu

un ley di estado of un medida general di gobierno di reino, of cu interesnan, di cua nan mantenemento of garantia ta un asunto di Reino.

For di eynan, decision aki ta bay pa Rijkswinsterraad y Raad van State cu ta toets e y por duna orden pa destrui ley aki. Pero loke gobernador a haci akinan tabata no firma pa e presupuesto cana e caminda aki, pero pone 'on hold' por lo tanto.

Team di CFT

Mientras tanto Consejo di Minister di Reino a reuni ayera. Eynan minister Plasterk a confirma cu e team cu lo bay haci e investigacion riba presupuesto di Aruba, lo consisti di miembronan di College Financieel Toezicht (CFT), cu ta activo na Corsou y St. Maarten.

Ambos Aruba y Hulanda lo acerca miembronan di e college aki pa tuma parti di e team. Plasterk den su declaracionnan por cierto ta nenga cu gobernador Refunjol a haci su acto di no firma presupuesto bou instruccion di Hulanda.

"Esey no tabata bou instruccion di Den Haag, pero di su propio huicio.

"Medionan Hulandes cu por cierto no tabatin mucho otro atencion pa cu e asunto otro cu e aspecto cu confirmacion cu ex-secretario di estado Frans Weekers lo no participa den e investigacion, a keda puntra Plasterk riba loke nan ta mira como un cambio repentino di opinion na unda poco prome a papia di articulo 43, lid 2 y a menasa cu curatela pa yega awo na unda e ta bisa di tin confiansa den gobierno di Aruba.

Plasterk a bisa na prome instante cu no a papia di articulo 43, pa despues declara cu loke a acorda awo ta conta y no declaracionnan anterior. Confiansa den Aruba t'ey ainda.

Plasterk a bisa cu ta importante pa no solamente check e presupuesto pero tambe 'mira dor di dje'. Ademas Plasterk a declara cu Aruba ta trahando duro riba tereño socio-economico y di sostenibilidad. □